

26 AUG 1999

Pekerja-Sagu hati

BEKAS PEKERJA LADANG TERIMA SAGU HATI RM1.3 JUTA

DENGKIL, 26 Ogos (Bernama) -- Seramai 350 orang bekas pekerja Ladang Prang Besar dan Galloway di Putrajaya hari ini diberi bayaran sagu hati kemanusiaan berjumlah RM1.3 juta bagi meringankan bebanan mereka yang terpaksa berpindah.

Kerajaan melalui Putrajaya Holdings Sdn Bhd mengambil alih beberapa ladang termasuk Ladang Prang Besar dan Galloway bagi memajukan projek pembangunan pusat pentadbiran negara yang baru di Putrajaya itu.

Menteri Sumber Manusia Datuk Lim Ah Lek ketika menyampaikan bayaran itu hari ini meminta semua pihak yang terbabit dengan pembangunan tanah bagi tujuan komersil, mengambil kira nasib pekerja-pekerja yang kehilangan pekerjaan dan tempat tinggal.

Turut sama menyampaikan bayaran sagu hati itu di Taman Permata di sini ialah Presiden MIC yang juga Menteri Kerja Raya Datuk Seri S.Samy Vellu.

Bayaran sagu hati itu adalah sumbangan bersama Putrajaya Holdings dan pentadbir ladang-ladang terbabit.

Selain sagu hati, bekas pekerja ladang itu juga menerima bayaran pampasan berjumlah RM1.8 juta.

Kerajaan Negeri Selangor pula telah membina 400 unit yang setiap satu berharga RM20,000 bagi menempatkan semula bekas pekerja ladang itu.

Samy Vellu berkata kerajaan negeri Selangor telah mengeluarkan belanja RM18 juta bagi membina rumah-rumah itu malah telah menurunkan harganya daripada RM36,000 seunit kepada RM20,000 seunit bagi memudahkan bekas pekerja itu.

Menurutnya keprihatinan kerajaan terutamanya Perdana Menteri Datuk Seri Dr Mahathir Mohamad untuk melihat masalah bekas-bekas pekerja ladang ini selesai telah terbukti.

"Apabila saya merujuk masalah bekas pekerja ini kepada pengetahuan kabinet dan Perdana Menteri, Dr Mahathir telah mengarahkan Lim menyelesaikannya dengan segera," kata Samy Vellu.

-- BERNAMA

MHI LAT